

Incumbensa da la fracziun da la PCD concernent ils scenaris da la politica da finanzas per la cassa chantunala

Anc adina essan nus en la fasa acuta da la pandemia dal coronavirus. Cun mesiras immediatas en il sector da la sanadad e da l'economia vulain nus limitar ils donns. Per questas mesiras dovri meds finanzials publics considerabels. Pervia d'ina politica da finanzas moderada durant ils ultims onns en cumbinaziun cun in svilup economic positiv han tant la Confederaziun sco er il chantun Grischun ina basa finanziaria solida per financiar questas mesiras e per porscher in agid immediat a quellas e quels ch'èn en miseria.

A medem temp na dastgan en mintga cas er betg vegnir emblidads auters secturs e la vista sto s'orientar en emprima lingia vers l'avegnir. La pandemia dal coronavirus ha ina dinamica e consequenzas fitg eterogenas e complexas, gist en ina societad ed en l'economia publica uschè fermamain entretschada sco la nossa. Questa complexitad vegn er ad avair effects per las finanzas chantunalas, dals quals nus savain dentant anc pauc per il mument. En vista als daners ch'èn la finala tuttina limitads, a las sfidas ch'èn anc adina avant maun, a la responsabladad envers la proxima generaziun ed en relaziun cun las incumbensas en auters secturs politics èsi impurtant d'eruir tant pli svelta la libertad d'agir actuala, dentant cunzunt er futura da la politica da finanzas. Pervia da las probabilitads intschertas e pervia dal grond spectrum da svilups pussaivels vegni ad esser indispensabel da pensar en scenaris. Mo uschia poi vegnir impedi ch'i restia insacura mo pli l'opziun d'in dir program da spargn – eventualmain er – sco mesira acuta cun effects eterogens e complexs.

Las sutsegnadras ed ils sutsegnaders incumbenseschan perquai la Regenza da prender posiziun detagliadamain en in rapport separà u il pli tard en il rom da la missiva tar il preventiv 2022 en spezial davart las suandantas dumondas:

1. Tge consequenzas finanzialas spetga la Regenza a curta vista da l'epidemia da COVID-19 per la cassa chantunala en quai che concerna ils effects epidemiologics, ils effects socials, ils effects per l'economia publica ed ils effects per l'economia regiunala?
2. Tge consequenzas finanzialas spetga la Regenza a pli lunga vista en quest connex per la cassa chantunala?
3. En tge scenaris pensa il chantun per impedir eventualas situaziuns problematicas per las finanzas publicas?

Tavau, ils 18 da favrer 2021

Maissen, Crameri, Schneider, Berther, Bondolfi, Brunold, Caluori, Cantieni, Casutt-Derungs, Deplazes (Rabius), Derungs, Epp, Florin-Caluori, Föhn, Kohler, Kunfermann, Loepfe, Ruckstuhl, Sax, Schmid, Tomaschett (Breil), Ulber, Zanetti (Landquart), Bürgi-Büchel, Collenberg, Decurtins-Jermann, Heini